

LIS PREDICJIS DAL MUINI

di pre Josef Marchet - Udin, 1965

Il salt dal zocul

Doman messe es siet: usgnot a dî il rosari o sin in sîs, doman a scoltâ la messe o sarin in cuatri... Il merit al va, prin di dut a Florean Baduscli che al ten dût chest an cui siei velions... Si viôt che al à di vê plene la cjanive di scjaveçs e di agarolis: robe che vie pal dì nol po sbolognâ, parcè che nancje il gargat rusinît di Blâs Cuzine no la sopuarte, di tant perfide che e je. Di gnot, invezit, di là di une cierte ore, ogni bore e fâs lusôr e no si cjale tant par sutîl. O ai simpri dit jo, che Florean Baduscli al è il çurviel plui fin di Gargagnà, ancje se par difûr, su la crodie, i nas une grumbule par setemane, che al pâr un scarnòs di cjariesis malmaduris. Si capìs che la sô inteligjence e je tante che sbrudie fûr come il sudôr.

E cussì, usgnot la nestre int e pree rosari cu lis talpis là di Baduscli; doman a buinore la zoventût strache e restarà a durmî, voaltris, biâts viei, o varês ce fâ ator i nemâi e pre 'Scjefin al disarà messe pai cjadelots.

Vô, comari 'Sese, intant che o spietavis di jentrâ, su la puarte de glesie, o disevis a Tunine de Roste che si scuen pursì lassâ la zoventût che e fasi il salt dal zocul, che e gjoldi la sô ore, che si spitichi fin che e à timp, par che no vebin di pintîsi plui tart e di maludî cui che ju à sacrificâts sul moment dal lôr sverdeâ; e o vês mandadis al velion lis vuestris dôs polecis.

Al vignarès a stai, che vô no veis nuie di ce pintîsi - no mo? - parcè che di zovine no si seis lafè sparagnade, Taresine la More! No veis pierdude une sagre, no veis saltât un velion, no veis sacrificade une ocasion di divertîsi, di fâsi braçolâ dai fantats, di fâsi fâ i ûs di cuc! Sêso contente cumò, sêso sodisfate? Ce vêso di plui di une altre che no à fat mai la mate, che no à pierdude la anime a sbrendui pai breârs o daûr des cjarandis? Us implenial il cûr chel pinsîr des matetâts di za cincuante agns? E alore parcè sêso simpri ledrose, simpri in grinte come une sbilfe? Disêt la veretât: se no fossis ridusude dute a peleotis, che nissun us tocje nancje cu la forcje, no saressiso lade vulintîr ancje vô a marcolâ inte sale di Baduscli? No ju vaîso ancjemò chei agns?

E Lise Cragnute, la vuestre compagne di mateçs, ce aie cumbinât cun dute la sô braure? E à fatis tantis vitis par maridâsi ben e po e à finît cul cjoli Bortul Cjalin che al va a cjichis par Udin.

Vô la jù, Mariute di Bet, che no veis stât ni a balâ ni a fâ mateçs, ma o veis tribulât di fantate a tirâ sù fradis plui piçui che vuestre mari e veve lassâts vuarfins, e di femine a nudrî i vuestris fruts, la vaîso la zoventût sacrificade? O veis fîs e fradis che us tegnin cont come un dêt madûr, no us mancje ni la bocjade, il il vistît, ni une midisine, ni l'afiet de famee: us displasial di vê pierdûts i divertiments? Fasaressiso diferent se o vessis di tornâ fantaçute?

O sin culî, usgnot, in cuatri carampans, ducj - pôc sù pôc jù - di chê etât: cjalînsi intai vôi, fevelînsi sclet, cumò che nissun nus sint. Co si è rivâts cul pît sul ôr de buse, cul vuessam che al clope, cu la crodie spelade e une magagne par ogni comissure, vanzial timp di contâ cetantis staiaris o cetantis mazurchis che si à pierdudis di zovins? Se cualchidun di voaltris al à cualchi pintiment, che al si fermi sul sagrât a spietâ mê comari 'Sese, e che al fâsi cun jê une biele danze, intant che jo lu compagni sunant la ore di gnot. E cun cheste us doi la buine sere.